



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 039106 20 Iž**  
**Sarajevo, 14.12.2020. godine**

Sud Bosne i Hercegovine, u drugostepenom vijeću sastavljenom od sudija Zvezdana Antonović, kao predsjednika vijeća, Mirsada Džindo i Dr Branka Moraita, kao članova vijeća, odlučujući o žalbi političke stranke „Glas naroda“ Bosne i Hercegovine ul. 25. Novembar 109, Živinice, koja osporava Odluku Centralne izborne komisije BiH broj: 05-1-07-1-1333/20 od 05.12.2020. godine o utvrđivanju i objavljivanju rezultata lokalnih izbora u Bosni i Hercegovini 2020.godini, na nejavnoj sjednici, održanoj dana 14.12.2020. godine, donio je

**R J E Š E N J E**

Žalba se odbija.

**O b r a z l o ž e n j e**

Odlukom Centralne izborne komisije Bosne i Hercegovine, broj i datum kao u uvodu, utvrđeni su i objavljeni rezultati Lokalnih izbora u BiH 2020.godine.

Protiv ove odluke žalitelj je izjavio žalbu kojom navodi da se prilikom utvrđivanja mandata nije vodilo računa o proporcionalnoj zastupljenosti političkih subjekata, na način da je političkom subjektu SDA-Stranka demokratske akcije dodjeljeno 12 mandata, te da je na navedeni način ugrožen izborni rezultat žalitelja.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da **žalba nije osnovana**.

Centralna izborna komisija Bosne i Hercegovine je pobijanom odlukom utvrdila i objavila rezultate lokalnih izbora 2020.godine za sve nivoe vlasti, nakon što je objedinila glasove birača koji su glasali na redovnim biračkim mjestima, birača koji su glasali u odsustvu, birača koji su glasali putem mobilnog tima i posebnog mobilnog tima, birača koji su glasali putem pošte i glasova birača koji su glasali nepotvrđenim glasačkim listićima.

Članom 2. navedene odluke je propisano da je sastavni dio ove odluke i detaljan tabelarni prikaz rezultata glasanja za svaki izborni nivo iz člana 1. stav (1) po

osnovnim izbornim jedinicama, biračkim mjestima i političkim subjektima i kandidatima.

Odredom člana 13.5 stav (1) Izbornog zakona BiH propisano je da se raspodjela mandata za Kantonalnu skupštinu i općinsko vijeće, odnosno Skupštinu općine vrše u skladu sa članom 9.5 ovog zakona.

Nadalje, odredbom čl. 9.5 Izbornog zakona BiH propisano je da se u svakoj izbornoj jedinici mandati raspoređuju na sljedeći način: za svaku političku stranku i koaliciju ukupan broj važećih glasova koje je politička stranka ili koalicija osvojila dijeli sa 1,3,5,7, 9, 11 i tako redom, se dok je to potrebno za tu raspodjelu mandata. Brojevi koji se dobiju ovom serijom dijeljenja su „količnici“. Broj glasova za nezavisnog kandidata je količnik tog kandidata.

Iz tabelarnog prikaza raspodjele mandata proizilazi da je 31 najveći količnik koji se dobije kada se podjeli broj glasova koje je osvojio politički subjekt SDA-Stranka demokratske akcije, sa brojem 23 i koji iznosi 450,7826, kojim je navedena politička stranka osvojila 12 mandata.

Imajući u vidu da se za Gradsko vijeće Grada Živinice raspodjeljuje ukupno 31 mandat to jasno proizilazi da je raspodjela mandata izvršena na pravilan i potpun način i u skladu sa Odredbama Izbornog zakona BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81 stav 1 Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA**  
**S U D I J A**  
**Zvezdana Antonović**